



雜阿含經

第十三

二百七十三  
川三

49484



雜阿含經卷第二十三

宋天竺三藏求那跋陀羅譯

如是我聞一時佛住王舍城迦蘭陀竹園  
時世尊晨朝著衣持鉢共諸比丘僧入城乞  
食如偈所說

身色如金山 端嚴甚微妙 行步如鵝王

面如淨滿月 世尊與眾俱

時世尊以足踐城門限地作六種震動如偈  
所說

大海及大地 城郭并諸山 牟尼足所踐

動搖如浪舟

佛變現如是神力時諸民人高聲唱言奇特





未嘗有法變現神力如佛世尊入城示現如是種種未曾有法如偈所說

地下即成平 高地反為下 由佛威神故

荆棘諸瓦礫 皆悉不復見 聾盲及啞

即得見聞語 城郭諸樂器 不擊妙音出

時彼世尊光相普照如千日之炎如偈所說

世尊身光明 普照城邑中 民人蒙佛光

涼若旃檀塗

時世尊順邑而行時彼有兩童子一者上姓

二者次姓共在沙中嬉戲一名闍耶二名毗

闍耶遙見世尊來三十二大人相莊嚴其體時

闍耶童子心念言我當以麥麩仍手捧細沙



著世尊鉢中時毗闍耶合掌隨喜如偈所說  
見大悲世尊 通身一尋光 勇顏靚世尊  
心生大敬信 捧沙即奉施 得離生老際  
時彼童子而發願言以惠施善根功德今得  
一天下一繖蓋王即於此生得供養諸佛如  
偈所說

牟尼知彼心 及彼意所願 受果增善根  
及福田力故 即以大悲心 受其奉施沙  
時闍耶以此善根當得為王王闍浮提乃至  
得成無上正覺故世尊發微笑今時阿難見  
世尊發微笑即便合掌向佛而白佛言世尊  
諸佛世尊阿羅訶三藐三佛隨非無因緣而

能發微笑今佛世尊以何因緣而發微笑如  
偈所說

世尊離調笑 無上世中尊 齒白如珂玉

最勝今發笑 勇猛勤精進 無師而自覺

妙言今樂聞 無上柔軟音 而記彼童子

梵音遠清徹 無上兩足尊 記彼施妙果

今時世尊告阿難曰如是如是如汝所說諸  
佛無有因緣亦不發笑我今笑者其有因緣  
阿難當知於我滅度百年之後此童子於巴  
連弗邑統領一方為轉輪王姓孔雀名阿育  
正法治化又復廣布我舍利當造八万四千  
法王之塔安樂無量衆生如偈所說



於我滅度後。是人當作王。孔雀姓名育。譬如頂生王。於此閻浮提。獨王世所尊。阿難取此鉢中所施之沙。捨著如來經行處。當行彼處。阿難受教。即取鉢沙。捨經行處。阿難當知。於巴連弗邑有王。名曰月護。彼王當生子。名曰頻頭婆羅。當治彼國。彼復有子。名曰修師摩。時彼瞻婆國有一婆羅門女。極爲端正。令人樂見。爲國所珍。諸相師輩見彼女。相即記彼女當爲王妃。又生二子。一當領一天下。一當出家學道。當成聖跡。時彼婆羅門聞彼相師所說。歡喜無量。即持其女。詣巴連弗邑。種種莊嚴。莊嚴其體。欲嫁與修師摩王子。



相師云應嫁與頻頭娑羅王彼女當生福德  
子子當紹王基婆羅門即以其女嫁與此王  
王見其女端正有德即為夫人前夫人及諸  
媒女見是夫人來作是念言此女極為端正  
國中所珍王若與彼相娛樂者棄捨我等乃  
至目所不視諸女輩即使學習剃毛師業彼  
悉學已為王料理鬚髮料理之時王大歡喜  
即問彼女汝何所求欲女啓王言唯願王心  
愛念我耳如是三啓時王言我是刹利灌頂  
王汝是剃毛師云何得愛念汝彼女白王言  
我非是下姓生乃是高族婆羅門之女相師  
語我父云此女應嫁與國王是故來至此耳

王言若然者誰令汝習下劣之業女啓王言  
是舊夫人及姝女令我學此王即勅言自今  
勿復習下業王即立為第一夫人王恒與彼  
自相娛樂仍便懷體月滿生子生時安隱母  
無憂惱過七日後立字無憂又復生子名曰  
離憂無憂者身體鹿澀父王不大附捉情所  
不念父王欲試二子呼賓伽羅阿時婆羅門  
言和尚觀我諸子於我滅後誰當作王婆羅  
門言將此諸子出城金殿園館中於彼當觀  
其相乃至出往彼園時阿育王母語阿育言  
承王出金殿園館中觀諸王子於我滅後誰  
當作王汝今云何不去阿育啓言王既不念



我亦復不樂見我母復言但往彼所阿育復  
啓母復勅今往今便往去願母當送飲食母  
言如是當出城去時出門逢一大臣名曰阿  
菟羅陁此臣問阿育言王子今至何所阿育  
荅言聞大王出在金殿園館觀諸王子於我  
滅後誰當作王今往詣彼王先勅大臣若阿  
育來者當使其乘老鈍象來又復老人爲眷  
屬時阿育乘是老象乃至園館中於諸王子  
中地坐時諸王子各下飲食阿育母以瓦器  
盛酪飯送與阿育如是諸王子各食飲食時  
父王問師言此中誰有王相當紹我位時彼  
相師視諸王子見阿育具有王相當得紹位



又作是念此阿育王所不於我若語言當作  
王者王必愁憂不樂即語言我今摠記王報  
言如師所教師言此中若有乘好乘者是人  
當作王時諸王子聞彼所說各念言我乘好  
乘時阿育言我乘老宿象我得作王時王又  
復語師言願更爲觀受記師復荅言此中有  
第一坐者彼當作王諸王子各相謂言我坐  
第一坐阿育言我今坐地是我勝坐我當作  
王復語師更爲重觀師又報言此中上器上  
食此當得王乃至阿育念言我有勝乘勝坐  
勝食時王觀子相畢便即還宮時阿育母問  
阿育言誰當作王婆羅門復記誰耶阿育啓

言上乘上坐上器上食當作王子自見當作  
王老象爲乘以地爲坐素器盛食粳米雜酪  
飯時彼婆羅門知阿育當作王數修敬其母  
其母亦重餉婆羅門即便問言大王崩後誰  
當作王師荅言此不可說也如是乃至三問  
師言吾當語汝慎勿使人知汝生此子名曰  
阿育是其人也夫人白言我聞此語歡喜踊  
躍若王聞者於師所不生敬信師今可還本  
住處若子作王者師當一切得吉利盡形供  
養時頻頭娑羅王邊國怛叉尸羅反時王語  
阿育汝將四兵衆平伐彼國王子去時都不  
與兵甲時從者白王子言今往伐彼國無有



軍仗云何得平阿育言我若爲王善根果報者兵甲自然來應發是語時尋聲地開兵甲從地而出即將四兵往伐彼國時彼諸國民人聞阿育來即平治道路莊嚴城郭執持吉瓶之水及種種供養奉迎王子而作是言我等不反大王及阿育王子然諸臣輩不利我等我等是故違背聖化即以種種供養王子請入城邑平此國已又使至伐佉沙國時彼二大力士爲王平治道路推諸山石又復諸天宣今此國阿育當王此天下汝等勿興逆意彼國王即便降伏如是乃至平此天下至於海際時修師摩王子出外遊戲又復遇逢



一大臣臣不修禮法王子即使人打拍其身  
大臣念言此王子未得王位用性如是若得  
王者不可而當又聞阿育得天下得壞五百  
大臣我等相與立阿育為王領此天下又著  
又尸羅國友諸臣共議令修師摩王子去王  
亦應可即便往彼國不能降伏時父王復得  
重疾王語諸臣吾今欲立修師摩為王今阿  
育往至彼國時諸臣欲令阿育作王以黃物  
塗阿育體及面手脚已諸臣白王言阿育王  
子今得重疾諸臣即便莊嚴阿育將至王所  
今且立此子為王我等後徐徐當立修師摩  
為王時王聞此語甚以不喜憂愁不樂默然

不對時阿育心念口言我應正得王位者諸  
天自然來以水灌我頂素繒繫首尋聲諸天  
即以水灌阿育頂素繒繫首時王見此相貌  
極生愁惱即便命終阿育王如禮法殯葬父  
王已即立阿菟樓陁為大臣時修師摩王子  
聞父崩背今立阿育為王心生不忍即集諸  
兵而來伐阿育阿育王四門中二門安二力  
士第三門安大臣自守東門時阿菟樓陁大  
臣機關木象又作阿育王像像即騎象安置  
東門外又作無烟火坑聚以物覆之修師摩  
既來到時阿菟樓陁大臣語修師摩王子欲  
作王者阿育在東門可往伐之能得此王者



自然得作王時彼王子即趣東門即墮火坑  
便即死亡

尔時有一大力士名曰跋陀羅由陀聞修師  
摩終亡馱世將無量眷屬於佛法中出家學  
道加勤精進逮得漏盡成阿羅漢道

阿育王正法治化時諸臣輩以我等共立阿  
育爲王故輕慢於王不行君臣之禮王亦自  
知諸臣輕慢於我時王語諸臣曰汝等可伐  
華果之樹植於刺棘諸臣荅曰未嘗見聞却  
除華果而植刺樹而見除伐刺樹而植果實  
乃至王三勅令伐彼亦不從尔時國王忿諸  
大臣即持利劍殺五百大臣又時王將嫁女



眷屬出外園中遊戲見一無憂樹華極敷盛  
王見已此華樹與我同名心懷歡喜王形體  
醜陋皮膚麤澀諸嫫女輩心不愛王憎惡王  
故以手毀折無憂華樹王從眠覺見無憂樹  
華狼藉在地心生忿怒繫諸嫫女以火燒殺  
王行暴惡故曰暴惡阿育王時阿菟樓陀大  
臣白王言王不應爲是法云何以手自殺人  
諸臣嫫女王今當立屠殺之人應有所殺以  
付彼人王即宣教立屠殺者彼有一山名曰  
耆梨中有一織師家織師有一子亦名耆梨  
凶惡搗打繫縛小男小女及捕水陸之生乃  
至拒逆父母是故世人傳云凶惡者梨子時

王諸使語彼汝能爲王斬諸凶人不彼荅曰  
一切閻浮提有罪者我能淨除況復此一方  
時諸使輩還啓王言彼人已得凶惡者王言  
覓將來也諸使呼彼彼荅言小忍先奉辭父  
母具說上事父母言子不應行是事如是三  
勅彼生不仁之心即便殺父母已然後乃至  
諸使問曰何以經久不速來也時彼凶惡具  
說上事諸使者以是事具啓王王即勅彼我所  
有罪人事應至死汝當知之彼啓王言爲我  
作舍王乃至爲其作舍屋室極爲端嚴唯開  
一門門亦極精嚴於其中間作治罪之法羅  
烈狀如地獄彼獄極爲勝好時彼凶人啓王



言今從王乞願若人來入此中者不復得出  
王荅言如汝所啓乞願當以與汝時彼徒主  
往詣寺中聽諸比丘說地獄事時有比丘講  
地獄經有衆生生地獄者地獄即執彼罪人  
以熱鐵鉗鉗開其口以熱鐵丸著其口中次  
融銅灌口次復鐵斧斬截其體次復杻械枷  
鎖檢繫其身次復火車鑪炭次復鐵鑊次復  
灰河次復刀山劒樹具如天五使經所說彼  
屠主具聞比丘說是諸事問其住處所作治  
罪之法如彼所說按此法而治罪人  
又一時商主將其婦入於大海入海時婦便  
生子名曰爲海如是在海十有餘年採諸重

寶還到本鄉道中值五百賊殺於商主奪彼  
寶物亦時商主之子見父傷死及失寶物狀  
世間苦故於如來法中出家學道還其本土  
遊行諸國次至巴連弗邑過此夜已晨朝著  
衣持鉢入城次第乞食誤入屠殺舍中時彼  
比丘遙見舍裏見火車鑪炭等治諸衆生如  
地獄中尋生恐怖衣毛皆豎便欲出門時凶  
惡即往執彼比丘言入此中者無有得出汝  
今於此而死比丘聞其所說心生悲毒泣淚  
滿目凶主問曰汝云何如小兒啼亦時比丘  
以偈答曰

我不恐畏死 志願求解脫  
所求不成果



是故我啼泣 人身極難得 出家亦復然  
遇釋師子王 自今不重覩

尔時凶主語比丘曰汝今必死何所憂惱此  
丘復以哀言荅云乞我少時生命可至一月  
彼凶不聽如是日數漸減止於七日彼即聽  
許時此比丘知將死不久勇猛精進坐禪息  
心終不能得道至於十日時王宮內人有事  
至死送付凶惡之人令治其罪凶主將是女  
人著臼中以杵擣之令成碎末時比丘見是  
事極厭惡此身嗚呼苦哉我不久亦當如是  
而說偈言

嗚呼大悲師 演說正妙法 此身如聚沫

於義無有實

向者美女色

今將何所在

生死極可捨

愚人而貪著

係心緣彼處

今當脫鎖木

今度三有海

畢竟不復生

如是勤方便

專精修佛法

斷除一切結

得成阿羅漢

時彼凶惡人語此比丘期限已盡比丘問曰

我不解尔之所說彼凶荅曰先期七日今既

已滿比丘以偈荅曰

我心得解脫 無明大黑闇 斷除諸有蓋

以殺煩惱賊 慧日今已出 鑒察心意識

明了見生死 今者愍人時 隨順修聖法

我今此身骸 任爾之所為 無復有惓惜



尔時彼凶主執彼比丘著鐵鑊油中足與薪  
火火終不然假使然者或復不熱凶主見火  
不然打拍使者而自然火火即猛盛久久開  
鐵鑊蓋見彼比丘鐵鑊中蓮華上坐生希有  
心即啓國王王即便嚴駕將無量衆來看比  
丘時彼比丘調伏時至即身昇虛空猶如鷹  
王示種種變化如偈所說

王見是比丘身昇在虛空

心懷大歡喜

合掌觀彼聖我今有所白

意中所不解

形體無異人神通未曾有

爲我分別說

修習何等法令汝得清淨

爲我廣敷演

令得勝妙法我了法相已

爲汝作弟子

畢竟無有悔

時彼比丘而作是念我今調伏是王多有所導攝持佛法當廣分布如來舍利安樂無量衆生於此閻浮提盡令信三寶以是因緣故自顯其德而向王說偈言

我是佛弟子

逮得諸漏盡

又復是佛子

不著一切有

我今已調伏

無上兩足尊

息心得寂靜

生死大恐怖

我今悉得脫

有離三有縛

如來聖法中

獲得如是利

時阿育王聞彼比丘所說於佛所生大敬信又白比丘言佛未滅度時何所記說比丘荅言佛記大王於我滅後過百歲之時於巴連



弗邑有三億家彼國有王名曰阿育當王此  
閻浮提為轉輪王正法治化又復宣布我舍  
利於閻浮提立八万四千塔佛如是記大王  
然大王今造此大地獄殺害無量民人王今  
宜應慈念一切衆生施其無畏今得安隱佛  
之所記大王者王當如法修行而說偈言

當行哀愍心

莫惱諸群生

當修習佛法

廣布佛舍利

時彼阿育王於佛所極生敬信合掌向比丘  
作禮我得大罪今向比丘懺悔我之所作甚  
為不可願為佛子受我懺悔捨心勿復責我  
愚人今復歸命而說偈言

我今歸依佛

無上勝妙法

比丘諸衆尊

我今盡命歸

我今當勇猛

奉受世尊勅

於此閻浮提

普立諸佛塔

種種諸供養

懸繒及幡幢

莊嚴世尊塔

妙麗世希有

時彼比丘度阿育王已乘空而化時王從彼

地獄出凶主白王言王不復得去王曰汝今

欲殺我耶彼曰如是王曰誰先入此中荅曰

我是王曰若然者汝先應取死王即勅人將

此凶主著作膠舍裏以火燒之又勅壞此地

獄施衆生無畏時王欲建舍利塔將四兵衆

至王舍城取阿闍世王佛塔中舍利還復修

治此塔與本無異如是取七佛塔中舍利至



羅摩村中時諸龍王將是王入龍宮中王從  
龍索舍利供養龍即與之王從彼而出如偈  
所說

羅摩羅村中

所有諸佛塔

龍王所奉事

守護而供養

王從龍索分

諸龍開塔與

即持此舍利

漸進於餘方

時王作八万四千金銀瑠璃玻瓈篋盛佛舍  
利又作八万四千寶瓶以盛此篋又作無量  
百千幡幢繖蓋使諸鬼神各持舍利供養之  
具勅諸鬼神言於閻浮提至於海際城邑聚  
落滿一億家者爲世尊立舍利塔時有國名  
著叉尸羅三十六億家彼國人語鬼神言三

十六箇舍利與我等起立佛塔王作方便國中入少者令分與彼令滿家數而立爲塔時巴連弗邑有上座名曰耶舍王詣彼所白上座曰我欲一日之中立八万四千佛塔遍此閻浮提意願如是如偈讚曰

大王名阿育於先八塔中各取其舍利

於此閻浮提建立諸佛塔八万及四千

縱廣殊妙勝一日都使畢

時彼上座白王言善哉大王剋後十五日月食時令此閻浮提起諸佛塔如是乃至一日之中立八万四千塔世間民人興慶無量共号名曰法阿育王如偈讚曰



王聖種孔雀

安樂世間人

於此閻浮提

建立勝妙塔

本名爲惡王

今造勝妙業

共号名法王

相傳至於後

王已建八万四千塔歡喜踊躍將諸群臣往

詣雞雀精舍白耶舍上座曰更有比丘佛所

受記當作佛事不我當往詣彼所供養恭敬

上座荅曰佛臨般涅槃時降伏阿波羅龍王

陶師旃陀羅瞿波梨龍詣摩偷羅國告阿難

曰於我般涅槃後百年之中當有長者名瞿

多其子名曰優波崛多當出家學道無相佛

教授於人最爲第一當作佛事佛告阿難曰

遙見彼山不阿難白佛見也世尊佛告阿難

此山名優留曼荼是阿蘭若處名那荼婆佉  
隨順寂靜而偈讚曰

優波崛比丘

教授最第一

名聞振四方

最勝之所記

於我滅度後

當得作佛事

度諸衆生類

其數無有限

時王問上座曰尊者優波崛今已出世不上

座荅曰已出世出家學道降伏煩惱是阿羅

漢共諸無量比丘眷屬一萬八千住在優留

曼荼山中阿蘭若處哀愍衆生如佛說淨妙

法度無量諸天及人令人甘露城王聞已歡喜

踊躍即勅群臣速辦嚴駕將無量眷屬往詣

彼所修敬供養優波崛多時臣白王言彼聖



既在王國宜當遣信奉迎之彼自當來王答  
臣曰不宜遣信至彼所應當自往彼不宜來  
也而說偈曰

汝得金剛舌 那能不斷壞 諫我莫往彼

親近田舍人

王即遣信往彼尊者所言某日當來尊所時  
尊者思惟若王來者無量將從受諸大苦遍  
殺害微虫聚落人民作是念已答使者曰我  
當自往詣王所時王聞尊者自來歡喜踊躍  
從摩偷羅至巴連弗邑於其中間開安舟航  
於航懸諸幢蓋時尊者優波崛愍念王故將  
一万八千阿羅漢衆隨於水道逕至王國時

國中入啓王言尊者優波崛將一万八千比丘衆來至王聞大歡喜踊躍即脫瓔珞價直十萬而授與之王將諸大臣眷屬即出往尊者所即爲下食五體投地向彼作禮長跪合掌而作是言我今領此閻浮提受於王位不以爲喜今覩尊者踊躍無量如來弟子乃能如是如覩於佛而說偈言

寂滅已度世

汝今作佛事

世間愚癡滅

如日照佛世

爲世作導師

說法中第一

衆生可依怙

我今大歡喜

時王勅使者宣令國界尊者優波崛比丘今來此國如是唱言



欲得富貴者

遠離貧窮苦

常處天上樂

解脫涅槃者

當值優波崛

修敬今供養

未見諸佛者

今覩優波崛

時王嚴飾國界平治道路懸繒幡蓋燒香散

華及諸伎樂舉國人民皆出奉迎尊者優波

崛供養恭敬。爾時尊者優波崛白王言大王

當以正法治化哀愍衆生三寶難遇於三寶

中常以供養恭敬修念讚歎廣爲人說所以

者何如來應供等正覺知人見人常爲記說

我之正法寄在國王及我比丘僧等而說偈曰

世雄人中尊 正勝妙大法 寄付於大王

及我比丘僧

時王白優波崛曰我已建正法而說偈曰  
我已造諸塔 莊嚴諸國界 種種興供養  
幢幡及諸寶 廣布佛舍利 遍於閻浮提  
我興如是福 意願悉已滿 自身及妻兒  
珍寶及此地 今已悉捨施 供養賢聖塔  
時尊者優波崛讚王言善哉善哉大王應行  
如是法而說偈言  
捨身及財命 世世無所憂 受福無有窮  
必得無上覺

時王請尊者優波崛入城設種種座請尊者  
就坐衆僧令往雞雀精舍白尊者曰尊者顏  
貌端正身體柔爽而我形體醜陋肌膚麤澀



尊者說偈曰

我行布施時

淨心好財物

不如王行施

以沙施於佛

時王以偈報曰

我於童子時

布施於沙土

今獲果如是

何況餘妙施

尊者復以偈讚曰

快哉善大王

布施諸沙土

無上福田中

植果無窮盡

時阿育王告諸大臣我以沙布施於佛獲其  
果報如是云何而不修敬於世尊王復白優  
波崛言尊者示我佛所說法遊行處所當往

供養禮拜為諸後世衆生攝受善根而說偈言  
示我佛說法 諸國及住處 供養當修敬  
為後衆生故

尊者言善哉善哉大王能發妙願我當示王  
處所為後衆生時王將四兵軍衆及持種種  
供養香華幡幢及諸伎樂便將尊者發去尊  
者至隆頻林此是如來生處而說偈言

如來初生處 生時行七步 顧示諸四方

舉手指天上 我今最後生 當得無上道

天上及於人 我為無上尊

時王五體投地供養禮拜即立佛塔尊者白  
王言大王欲見諸天見佛生時行七步處不



王白言願樂欲見時尊者舉手指摩耶夫人  
所攀樹枝而告彼樹神曰樹神今現今王見  
之生大歡喜尋聲即見住尊者邊而作是言  
何所教勅我當奉行尊者語王言此神見佛  
生時王以偈問神曰

汝見嚴飾身

生時青蓮華

足行於七步

口中有所說

神以偈答曰

我見相好身

生時二足尊

舉足行七步

口中有所說

於諸天人中

我爲無上尊

時王問神言佛生有何瑞應神答言我不能  
宣說妙勝諸事今略說少分

光明能徹照

身體具相好

令人喜樂見

感動於天地

時王聞神所說歡喜施十萬兩珍寶而去

又將王入城裏語言此處菩薩現三十二相  
八十種好莊嚴其體紫磨金色時王向此處  
作禮興種種供養又將王至天寺中語王言太  
子生時令向彼神禮時諸神悉禮菩薩時諸  
民人爲菩薩立名今是天中天時王復以種  
種供養又將示處語王言此處父王以菩薩  
示諸婆羅門瞻其相德王復種種供養又示  
此處菩薩學堂此處學乘象此處學乘馬車  
乘弓弩如是學一切伎術處此處是菩薩治



身此處菩薩六万夫人遊戲處此處菩薩見  
老病死入此處菩薩坐閻浮提樹下坐禪得  
離欲樹影不離身父王向其作禮此處菩薩  
將百千天神出城而去此處菩薩脫瓔珞與  
車匿遣馬還國而說偈曰

菩薩於此處

脫瓔珞及冠

授與於車匿

遣馬還於國

獨行無有侶

便入學道山

又此處菩薩從獵師易袈裟衣被此衣已而  
爲出家此處是仙人所誓請處此處瓶沙王  
與菩薩半國處此處問優藍弗仙人此處菩  
薩六年苦行如偈所說

苦行於六年

極受諸苦惱

知此非真道

棄捨所習行

此處二女奉菩薩乳糜如偈所說

大聖於此中 受二女乳糜 從此而上去

往詣菩提樹

此處迦梨龍讚歎菩薩如偈所說

此處迦梨龍 讚歎於菩薩 當隨古時道

證無上妙果

時王向尊者而說偈曰

我今欲見龍 彼龍見佛者 從此趣菩提

證得勝妙果

時尊者以手指龍宮語曰迦梨龍王汝以見佛今當現身時龍王尋聲即出住在尊前合



掌白言何所教勅時尊者語王曰此龍王見佛讚歎如來時王合掌向龍而說偈曰

汝見金剛身 我師無儔匹 面如淨滿月

爲我說彼德 十力之功德 往詣道場時

時龍王以偈答曰

我今當演說 足踐於地時 大地六種動

光曜倍於日 遍照三千界 而趣菩提樹

時王如是等處處種種供養及立塔廟時尊者將王至道樹下語王曰此樹菩薩摩訶薩

以慈悲三昧力破魔兵衆得阿耨多羅三藐

三菩提而說偈言

牟尼牛王尊

於此菩提樹 降伏惡魔軍

得勝菩提果 天人中特尊 無能與等者  
時王捨無量珍寶種種供養及起大塔廟此  
處四天王各持一鉢奉上於佛合爲一鉢此  
處於賈客兄弟所受諸飯食此處如來詣波  
羅柰國時阿時婆外道問佛此處仙人園鹿  
野苑如來於中爲五比丘三轉十二行法輪  
而說偈言

此處鹿野苑

如來轉法輪

三轉十二行

五人得道跡

時王於是處興種種供養及立塔廟此處如  
來度優樓頻螺迦葉等仙人爲道此處如來  
爲瓶沙王說法王得見諦及無量民人諸天



得道此處如來爲天帝釋說法帝釋及八万  
諸天得道此處如來示大神力種種變化此  
處如來至天上爲母說法將無量天衆下於  
人間王復種種供養及立塔廟

時尊者語阿育王至鳩尸那竭國言此處如  
來具足作佛事畢於無餘般涅槃而般涅槃  
而說偈言

度脫諸天人

修羅龍夜叉

建立無盡法

佛事旣已終

於有得寂滅

大悲入涅槃

如薪盡火滅

畢竟得常住

時王聞是語憂惱迷悶躡地時諸臣輩以水  
洗心面良久得蘇啼泣涕零如是乃至興種

種供養立大塔廟

時王復白尊者曰我意願欲得見佛諸大弟子佛之所記者欲供養彼舍利願爲示之時尊者白王言善哉善哉大王能發如是妙心時尊者將王至舍衛國入祇桓精舍以手指塔此是尊者舍利弗塔王當供養王曰彼有何功德尊者曰是第二法王隨轉法輪而說偈言

一切衆生智 比於舍利弗 十六之一分  
以除如來智 如來轉法輪 是則能隨轉  
彼有無量德 誰復能宣說  
時王生大歡喜捨十萬兩珍寶供養其塔而



說偈言

我禮舍利弗

解脫諸恐怖

名稱普於世

智慧無有等

次復示大目捷連塔王應供養此塔王復問  
曰彼有何功德尊者答曰是神足第一以足  
指踐地地即震動至於天宮降伏難陀跋難

陀龍王而說偈曰

以足指動地

至於帝釋宮

神足無量等

誰能盡宣說

二龍王凶暴

見者莫不怖

彼於神足力

降伏息瞋恚

時王捨十萬兩珍寶供養此塔以偈讚曰

神足中第一

離於老病死

有如是功德

今禮目捷連

次復示摩訶迦葉塔語王言此是摩訶迦葉塔應當供養王問曰彼有何功德答曰彼少欲知足頭陀第一如來施以半座及僧伽梨衣愍念衆生興立正法即說偈曰

功德田第一

愍念貧窮類

著佛僧伽梨

能建於正法

彼有如是德

誰能具宣說

時王捨十萬兩珍寶供養是塔以偈讚曰

常樂於寂靜

依止林藪間

少欲知足富

今禮大迦葉

次復示尊者薄拘羅塔此是薄拘羅塔應當供養王問曰彼有何功德尊者答曰彼無病



第一乃至不爲人說一句法寂默無言王曰  
以一錢供養諸臣白王功德旣等何故於此  
供養一錢王告之曰聽吾所說

雖除無明癡

智慧能鑒察

雖有薄拘名

於世何所益

時彼一錢還來至王所時大臣輩見是希有  
事異口同音讚彼嗚呼尊者少欲知足乃至  
不須一錢

復示阿難塔語王言此是阿難塔應當供養  
王曰彼有何功德答曰此人是侍佛者多聞  
第一撰集佛經而說偈曰

奉持牟尼鉢

念至能決斷

多聞之大海

辯才柔軟音 能悅天人衆 善知三佛心

一切悉明了 功德之寶篋 最勝所稱歎

降伏煩惱諍 如是等功德 應當修供養

王即捨百億兩珍寶而供養其塔時諸臣白

王言何故於此布施供養皆悉勝前王曰聽

吾所說心中所以

如來之體身 法身性清淨 彼悉能奉持

是故供養勝 法燈常存世 滅此愚癡冥

皆由從彼來 是故供養勝 如大海之水

牛跡所不容 如是佛智海 餘人不能持

唯有阿難尊 一聞悉受持 終無忘失時

是故供養勝



尔時王如是種種供養向尊者合掌而作是言  
我今受此形 不復負是身 修無量功德  
今爲人中主 我今取堅實 造立諸塔廟  
莊嚴在於世 如星莊嚴月 奉佛弟子法  
應行諸禮節 我今悉已作 誓首尊者足  
蒙尊者恩力 今見勝妙事 使獲大善利  
從是分別法

尔時王供養上種種事恒徧至菩提道場樹  
此樹下如來得阿耨多羅三藐三菩提世間  
希有珍寶供養之事供養菩提樹時王夫人  
名曰佉舍羅締多夫人作是念王極愛念於  
我我亦念王王今捨我去持諸珍寶至菩提

樹間我今當作方便殺是菩提樹樹既枯死  
葉便凋落王當不復往彼可與我常相娛樂  
即喚呪師語呪師言汝能殺菩提樹不彼答  
曰能與我千兩金時夫人即與千兩金錢呪  
師往菩提樹間以呪呪樹以繩繫樹時樹漸  
漸枯死葉即萎落未即枯死其葉凋落白夫  
人曰復應以熱乳澆樹乃可令枯夫人白王  
我今欲以乳供養菩提樹王曰隨卿意耶如  
是乃至以熱乳澆之樹即枯燥時諸夫人白  
王言菩提樹忽然枯死葉葉變落而說偈言  
如來所依樹 名曰菩提者 於是得正覺  
具足一切智 大王今當知 是樹今枯死



葉色亦變異 不知何以故  
時王聞是語即迷悶躡地諸人輩以水洗王  
心面良久而蘇即便泣淚言

我見菩提樹 便見於如來 今聞彼樹死

我今亦隨沒

時彼夫人見王憂愁不樂而白王言王勿憂  
惱我當喜悅王心王曰若無彼樹我命亦無  
如來於彼樹得阿耨多羅三藐三菩提彼樹  
既無我何用活耶夫人聞王決定語還復以  
冷乳灌菩提樹下彼樹尋復更生王聞以乳  
漑灌樹還得生日日送千甕乳漑灌其本樹  
還復如先諸夫人輩白王言菩提樹今復如

先無復有異時王聞已即生歡喜詣菩提樹  
下覩於菩提樹目不暫捨而說偈言

諸王所未作 瓶沙持國等 我今應供養

我今浴菩提 諸乳及香水 華香及塗香

當復供養僧 賢聖五部衆

時王各辦四寶甕金銀瑠璃玻瓈盛諸香乳  
及諸香湯持種種飲食幡幢寶蓋各有千種  
及種種華香伎樂受持八支齋布薩著白淨  
衣服執持香鑪在於殿上向四方作禮心念  
口言如來賢聖弟子在諸方者憐愍我故受  
我供養而說偈言

如來賢聖子 正順寂諸根 離諸三界欲



諸天應供養

今當悉來集

受我微心惠

哀愍副我意

令法種增長

常樂於寂止

解脫諸所著

如來之真子

從法而化生

諸天所供養

哀愍於我故

今當悉來集

副我之微意

諸聖在處處

闍賓多波婆

大林離波多

阿耨大池邊

江河山藪間

如是一切處

諸聖在中者

今當悉來集

哀愍於我故

副我之微意

又在於天上

尸梨婆宮殿

香山石室中

神通具足者

今當悉來集

哀愍於我故

時王如是語時三十万比丘悉來集彼大眾

中十万是阿羅漢二十万是學人及凡夫比

立上座之座無人坐時王問諸比丘上座之  
座云何而無人坐時彼大衆中有一比丘名  
曰耶舍是大阿羅漢具足六通白王言此座  
上座之座餘者豈敢於中而坐王復問曰於  
尊者所更有上座耶尊者答曰更有上座大  
王佛之所記名曰賓頭盧是上座應坐此處  
王大歡喜而作是言於中有比丘見佛者不  
尊者答曰有也大王賓頭盧者猶故存世王  
復白曰可得見彼比丘不尊者曰大王不久  
當見尋當來至時王生大歡喜而說偈言  
我今快得利 攝受於我故 令我自目見  
尊者賓頭盧



時尊者賓頭盧將無量阿羅漢次第相隨譬  
如鴈王乘虛而來在於上座處坐諸比丘僧  
各修禮敬次第而坐

時王見尊者賓頭盧頭鬚皓白辟支佛體頭  
面禮足長跪合掌觀尊者顏貌而說偈曰  
我今之王位 統領閻浮提 不以爲歡喜

今得見尊者

我今見尊者

便是見生佛

心懷大踊躍

勝見於王位

復白尊者曰尊者見世尊耶三界所尊仰時

尊者賓頭盧以手舉眉毛視王而言

我見於如來

於世無譬類

身作黃金色

三十二相好

面如淨滿月

梵音聲柔爽

伏諸煩惱諍 常處於寂滅

王復問曰尊者何處見佛尊者曰如來將五百阿羅漢俱初在王舍城安居我亦復在中而說偈言

大牟尼世尊 離欲相圍繞 在於王舍城

結於夏三月 我時在彼衆 恒住如來邊

大王今當知 我自見真佛

又復佛住舍衛國時如來大作神力種種變化作諸佛形滿在諸方乃至阿迦尼吒天我亦時亦在於中見如來種種變化神通之相而說偈曰

如來神通力 降伏諸外道 佛遊於十方



我親見彼相

又復如來在天上與母說法時我亦在於中  
與母說法竟將諸天衆從天上來下僧迦奢  
國時我見此二事天人受福樂優波羅比丘  
尼化作轉輪聖王將無量眷屬乘空而來詣  
世尊所我亦見此而說偈曰

如來在天上

於彼結夏坐

我亦在於中

牟尼之眷屬

又復世尊住舍衛國五百阿羅漢俱時給孤  
獨長者女適在於富樓那跋陀那國時彼女  
請佛及比丘僧時諸比丘各乘空而往彼我  
亦時以神力合大山往彼受請時世尊責我

汝那得現神足如是我今罰汝常在於世不  
得取涅槃護持我正法勿令滅也而說偈曰  
世尊受彼請 五百比丘俱 時我以神力  
挑大山而去 世尊責罰我 住世未滅度  
護持我正法 勿令法沒盡  
又復如來將諸比丘僧入城乞食時王共一  
童子沙土中戲逢見佛來捧於塵沙奉上於  
佛時世尊記彼童子於我滅度百歲之後此  
童子於巴連弗邑當受王位領閭浮提名曰  
阿育當廣布我舍利一日之中當造八万四  
千塔今王身是也我今時亦在於中而說偈曰  
王於童子時 以沙奉上佛 佛記於王時



我亦親在中

時王白尊者曰尊者今住在何處尊者答王曰在於北山山名捷陀摩羅共諸同梵行僧王復問曰有幾眷屬尊者答六万阿羅漢比丘尊者曰王何須多問今當施設供養於僧食竟使王歡喜王言如是尊者然我今先當供養佛念所覺菩提之樹然後香美飲食施設於僧勅諸群臣唱令國界王今捨十方兩金布施衆僧千甕香湯旣灌菩提樹集諸五衆時王子名曰拘那羅在王右邊舉二指而不言說意欲二倍供養大衆見之皆盡發笑王亦發笑而語言嗚呼王子乃有增益功德

供養王復言我復以三十万兩金供養衆僧  
復加千甕香湯洗浴菩提樹時王子復舉四  
指意在四倍時王瞋恚語臣曰誰教王子作  
是事與我興競臣啓王言誰敢與王興競然  
王子聰慧利根增益功德故作是事耳時王  
右顧視王子白上座曰除我庫藏之物餘一

切物閻浮提夫人姝女諸臣眷屬及我拘那  
羅子皆悉布施賢聖衆僧唱令國界集諸五  
衆而說偈曰

除王庫藏物 夫人及姝女 臣民一切衆  
布施賢聖僧 我身及王子 亦復悉捨與  
時王上座及比丘僧以甕香湯洗浴菩提樹



時菩提樹倍復嚴好增長茂盛以偈頌曰  
王浴菩提樹 無上之所覺 樹增於茂盛  
柯條葉柔爽

時王及諸群臣生大歡喜時王洗浴菩提樹  
已次復供養衆僧時彼上座耶舍語王言大  
王今大有比丘僧集當發淳信心供養時王  
從上至下自手供養時彼有二沙彌得食已  
各以麩團麩歡喜丸更互相擲王見即笑而  
言此沙彌作小兒戲供養訖已王還上座前  
立上座語王言王莫生不信敬心王答上座  
無有不信敬心然見二沙彌作小兒戲如世  
間小兒以土團更互相擲如是二沙彌以麩

團以麤歡喜丸更互相擲上座白王言彼二沙彌是俱解脫阿羅漢更相奉食王聞是已增其信心而作是念此二沙彌能展轉相施我今亦當於一切僧人施絹劫貝時二沙彌知王心所念二沙彌共相謂言令王倍增敬信一沙彌持鑊授與王一沙彌授以染草王問彼沙彌用作何等二沙彌白王言王因我故施與衆僧絹及劫貝我欲令大王染成其色施與衆僧時王作是念我雖心念口未發言此二達士得他心智而知我心王即稽首敬禮衆僧而說偈言

孔雀之族姓

內外親眷屬

因此惠施故



悉皆獲大利 遭值良福田 歡喜應時施  
 時王語沙彌言我因汝等施僧衣施僧衣已  
 復以三衣并四億萬兩珍寶嚫五部衆呪願  
 已復以四十億萬兩珍寶贖取閻浮提宮人  
 嫫女及太子群臣阿育王所作功德無量如  
 是

雜阿含經卷第二十三

川

荆棘

上居迎 下居力

反 音 啞

上於今 下烏雅

反 嬉

喜之 織 曝

反 調 咲

上徒用 下先妙

反 塌

音塔 式亮

殞 墓

上必進 下子

浪 搥 打

上竹瓜 下音頂

反 鉗

巨廉 相 械

上勅柳 下戶介

反 鑊

反 戶 郭 曰

巨九 係

反 古 詣

航 胡 郎 縱

先見 燥

先 坐

僻  
反毗  
益  
皓  
反戶  
老

